

UPA 2018/003

13. Marts 2018

Michael Rosing

Suleqatigiissitsisut

Siunnersuut uunga: Imikkut ittumik Inatsisartunut qinersinissaq pillugu Inatsisartut Inatsisaat nr. xx af xx. xxx 2018

(Naalakkersuisut Siulittaasuata)

Demokratimi tunngaviit ilaatigut ilaannikkut inatsisartunik nutaanik qinersiartortarnissarput. Uanga demokratimut angisuumik tapersersuisut ilangaannga. Taamaattumik erngerlunga oqaatigissavara Naalakkersuisut Siulittaasuata inassutaa ataqqigakku mannalugu siunnersuut akueralugu.

Taamaakkaluartorli marlussunnguanik uparaatissaqarpunga qinersinerup nalunaarutigineqarnera pillugu aamma pissutsit qinersinissatsinnut attuumassuteqartut uparualaassavakka.

Siullermik uannut ersarluppoq sooq massakkorpiaq qinersinissaq suaarutigineqarnera aamma suut tunngavilersuugalugit. Inatsisartut atuuffiata naalivinnerani upernaakkut ataatsimiiinnermi manna oqaluttarfik atorlugu qaammatini arlalinni qineqqusaartoqarnissaanut aallarniivittut atorneqassanerarlugu oqalunneq isumaqatigaara. Kikkut tamarmik qasunarissavaat, qinersisartut politikerillu, aamma nunap pisariaqartingisaanik politikerinik qatsussineq pilerataannaavoq.

Aappasaatut Naalakkersuisut Siulittaasuata tatiginninnginnermut taasisoqarnissaanut soqanngitsoq qinersiviup naanissaanut qaammatit pingasuinnanngortullu qinersinissamut suaaruteqarnera sunik inatsisinik pioreersunik tunngaveqarnera takujuminaatsippara.

Pingajussaanillu isumaqarpunga qinersinissaq suaarutiginiaannarlugu Inatsisartunik aggersaaneq naapertuutinnngitsumik aningaasartuutitaqartoq tassami naliginnaasumik ataatsimiigiqqussisoqareernikuugaluarat. Pisariinnerusimaqqooqaaq Naalakkersuisut Siulittaasua nutaamik qinersisoqarnissaanut siunnersuummik saqqummiussisimasuuppat inatsisartut ataatsimiiffianni ullormi siullermi. Aamma tamanna pissusissamisuunngilaq Inatsisartunimi ilaasortarpaalussuit taamatullu Naalakkersuisuni ilaasortarpaalussuit piffissami tassanerpiaq Torontomut angalapput allatulli ajornartumik PDAC-p ataatsimeersuarnerani peqataanertik maanaannaq kipisariaqarsimallugu.

Partiinngorlaatat atsiornernik katersileruttortugut qinersinissaq suaarutigineqarpoq taamaattumik Partiit marluk nutaat aappaani siulittaasutut eqqarsarpunga arlaatigut torrallaariartoqarsimagaluarnersoq. Atsiornerit katersagut ippassaq tunniuppugut taamaattumik qanorluunniit pisoqassagaluarpat angumersivugut, siumullu eqqarsakannersoqarsimasuugaluarpat isumarput naapertorlugu demokratimut ataqqinninnerulaartumik pissusilersortoqarsimassagaluarpog.

Qinersinerli eqqartoratsigu taamatullu demokrati taava sulī ataatsimik anersaaruluutissaqalaarpunga. Aningaasanut Inatsit misissorsimavara. Eqqortumik oqaatigalugu qineqqusaarnissamut tapiissutissat misissorsimavakka. Atuakkakka partiit nutaatut nuannaarutissartalissuunngillat. Takusinnaasakka naapertorlugit aningaasaliissutigineqarput, 3,6 millioner koruunit missaat tunngaviusumik partiinut 100.000 koruuninik agguasoqarluni. Tamatuma qaavatigut kingullermik qinersisoqarmat taasinerit ataasiakkaat pissarsiarineqarsimasut 100 koruuninnissutigineqassapput. Aaqqiineq ajorpasinngikkaluarpoq, politikkimi sulinermi tapiissutitut allatulli isikkoqarmat. Kisitsisilli isissorlualaaraanni Mathiusip evangiliua allassimasoq eqqortorta qarluartoq, imaattoq " Peqarluareersoq tunineqassaaq sulī peqarnerulersillugu; suuteqanngitsorli arsaarneqassaaq pigisaanik".

Partiinut tapiissutaasartut tassunga assersuukkutsigit ilanngullugillu partiit qinigaatitaasa Inatsisartuni sulinissaminut partiinut tapiissutaasartut, taava partiit immikkut tamarmik tunngaviusumik tapiissutisissapput 850.000 koruuninik qaavatigullu ilaasortaataqarnermut tapiissutit 275.000 koruunit. Aamma ajunngikkaluarpoq, inatsisartunimi ilaasortaatat qanorluunniit amerlatigaluarpata partiip allaffiata ingerlannera assigiimmik akeqarpoq, inatsisartunili ilaasortanik ataasiakkaanik sullissineq immikkut aningaasartuutitaqarpoq.

Soqutiginarortaali ersertarpoq naatsorsueriaatsit assigiinngitsut taakku marluk assersuutigleraanni. Inatsisartuni sulinermut tapiissutit eqqartorutsigit taava tunngaviusumik tapiissutit aningaasat tamarmiusut affangajangaat. Tassani pivarput suliaq suliarineqartussaq qinersinerup pisup inernera tunngavigalugu.

Qinersinissami aggersumi pisussaq assiguvoq tassani partiit qinersinermut atatillugu pisartut allaanerungaangitsut akilertussaavaat apeqqutaatinnagu ikittunnguanik amerlasuunilluunniit qinigassanngortitsisimanerlutik aamma apeqqutaatinnagu qassit qinigaanissaat naatsorsuutigineqarnersoq. Kisianni tassani aningaasat 17 %-iinnaasa missaat partimut tapiissutaapput sinnerilu ilaasortaataqarnermut tapiissutaallutik. Uanga isumaga naapertorlugu tamanna isumaqanngilaq aatsaalli isumalissaaq kissaatigineqarsimappat partiit pioreersut immikkut pineqarnissaat siunertaasimasoq.

Qularutigineqassanngilarli uangut Suleqatigiissitsisuni artorsarnavianngilagut taamaattumik una saqqummiussininni oqaaseqaatiga uani qinigaaffimmi kingulliususaaq naggaserlugu inatsisartoqatigisimasakka qutsavigerusuppassi aamma takoqqikkumaartugut kissarlunga.

Taamatut oqaaseqarlunga Inatsisartunut ulloq 24. april 2018 qinersisoqarnissaanut siunnersuutip akuerineqarnissaa inassutigaara.